

欽定剿平粵匪方略

欽定勦平粵匪方略卷一百八十五 丁巳年

十一月初四日

辛巳

官文都興阿胡林翼奏言查

安慶賊首派僞丞相曾逆帶船數百號來援小
孤山等處屯聚馬當華陽一帶楊載福親率各
營直抵馬當周圍截擊賊紛紛下竄我軍追勦
二十餘里焚奪賊船殆盡又焚燬華陽賊船百
餘號行至魚水溝地方遇賊僞指揮藍承先在

北岸抗拒我軍登岸夾擊藍逆受傷賊卡立破
九月二十三日水陸齊進馳抵望江城下李成
謀大呼殺賊賊衆驚潰追殺無數望江縣城登
時克復二十四日抵東流縣將城外賊船焚盡
破卡三座賊伏城不出我軍縱火焚燒火箭射
入城中房屋齊燃賊開城奔走聚而殲之縣城
克復疾趨安慶平鹽河口焚燬賊壘三座船數

十號再攻安慶對岸賊壘悉平二十五日全軍
衝至安慶破樅陽賊壘五座燒賊船八十餘號
二十六日破大通鎮賊壘三座燒賊船數十號
二十八日進攻銅陵縣城平壘四座城上矢石
如雨我軍不少退卻李成謀斬關直入賊大譁
潰乘勝一擁而進立復縣城盡力痛勦賊屍枕
藉復回兵攻奪土橋礮壘四座焚賊船百餘號

下駛至舊縣峽口見大船密布詢知係總兵李
德麟所統之紅單船賊於該處連築堅城二座
紅單船攻之不破楊載福親統各營先破賊兵
直逼偽城之下李成謀率眾先驅拋擲火彈城
中火藥發動城石迸裂賊匪奪路而出我軍長
驅直入盡將賊匪駢誅無一遺者十月初九日
駛回湖口聞江西有賊將至彭澤楊載福卽於

十三日移防彭澤查下游賊匪從未大加懲創
此次楊載福水師轉戰一千餘里克復縣城三
處破壘數十座焚船殺賊不可勝計軍威大振
自湖口以下七百餘里江面旬日肅清不但沿
江賊膽已寒且與紅單船聲勢聯絡查紅單船
向稱勇悍難馴統帶之員每難調遣此次日擊
楊載福奮勇冠軍士卒用命雖桀驁性成亦爲

心折將來大軍整旅東征必能和衷共濟尤爲
軍營緊要關鍵現飭水陸馬步專注九江以期
建瓴掃蕩所有尤爲出力之副將李成謀參將
李濟清可否先行

給子獎敘陣亡之把總劉長慶蕭得勝六品軍功李有
昇應請照例議卹其餘出力並傷亡員弁兵勇
容再查明分別獎卹奏入

上命軍機大臣傳諭福濟曰楊載福一軍下勦克復安
徽望江東流銅陵三縣著福濟迅卽派員分赴防守
招集鄉團齊心堵禦毋令得而復失

上諭內閣曰此次楊載福統帶水師轉戰一千餘里克
復縣城三處且與紅單船聯絡大振軍威九江賊匪
自可乘機掃蕩所有打仗出力之副將李成謀著賞
給伊祖父母父母二品封典以示優獎參將李濟清

著以副將儘先補用其陣亡之把總劉長慶蕭得勝
六品軍功李有昇均著該部照例議卹

官文都興阿胡林翼又奏言接奉

諭旨李孟羣退守麻埠飭湖北迅撥兵勇越境堵剿臣
等查九江各營圍剿潯城分防小池口湖口彭
澤等處且戰且守已無餘力可分至馬步各軍
進剿宿松太湖深入皖境已兩月餘桐城舒城

望江潛山及安慶省城之賊均係粵逆盤踞最
久臣都興阿督率各營由宿松太湖三路分勦
尙有防不勝防之勢擬俟潯城收復再行添調
兵勇協助臣等愚見馬步水師均已馳入江皖
節節進逼萬難抽調惟有力圖潯城及宿太等
處股匪再相度江皖情形何路緊要卽行馳往
庶免顧此失彼之虞

同日德興阿翁同書奏言臣等查瓜鎮逆匪糧食垂盡而賊首吳如哮兇狡異常專望金陵來援運糧固守南北兩軍久已合圍賊匪無從出掠惟慮金陵賊船由南岸沿江下竄疊飭水師參將黃彬等節節堵剿果有賊船屢次乘夜思竄均被觀音門水師擊回江面肅清未容片帆得渡而下關一帶又有大小賊船揚帆下駛復

經水師攔擊沈毀賊船多隻餘船悉傍南岸江
灘飛棹而回臣等仍當一面杜其接應一面迅
攻老巢與和春等併力圍剿以冀南北同時克
復均奏入報

聞

初五日壬午德興阿奏言頃奉

諭旨以武職幫辦乏人

飭令和春酌保帶兵大員一人前來幫辦仰見

皇上垂念江北之至意查武職幫辦必須臨陣勇敢調度有方方能勝任和春軍營人材惟有張國樑謀勇兼優忠勤素著但江南正在喫緊張國樑未必能來其餘各員臣等俱未敢深信因思江北軍營中非無武職得力大員查有總兵鞠殿華久歷戎行能戰能守足以當此重任合無仰

懇

天恩准臣所請

派令翰殿華幫辦臣營軍務藉資臂助奏入

上命軍機大臣傳諭德興阿曰前因江北軍營無武職大員幫辦軍務江南將才較多是以諭和春酌保一員一面奏聞一面飭赴江北德興阿如有可保之員亦當與和春函商會銜具奏方見和衷之意茲德興

阿奏保總兵鞠殿華堪勝幫辦並未與和春會商朕
若允其所請而和春又遵旨保舉一人卽日奏到轉
至事出兩歧著德興阿卽咨會和春如尙未保奏卽
將鞠殿華堪勝幫辦之處與和春會銜保奏聽候諭
旨德和春業已酌保有人所有德興阿請以鞠殿華
幫辦之處卽毋庸議

初六日

癸未

李孟羣奏言探得六安州城有賊數

千潛赴舒城勾結髮逆自東面撲入霍城代理
知縣王自輅赴鄉籌糧聞信趕回馳救無及知
府袁懷忠守備余先元在北面堵勦分守要隘
該逆突由東入實爲兵力所難防臣聞信之餘
擬派全軍往援因麻埠獨山均屬要隘未便盡
赴霍山反致西路鬆懈現於霍山各鄉添調團
練暫行扼守以杜賊匪旁竄一面咨請勝保袁

甲三派兵速攻六安州城一面飭袁懷忠等相機同時攻取霍山迅圖克復所有帶勇防勦之知府袁懷忠守備余先元雖因兼顧不及究屬不能豫防應請

旨暫行摘去頂戴以觀後效代理霍山縣知縣補用縣丞王自籛雖到任未及一月在外籌糧但究有失城之咎並請一併摘去頂戴責令帶罪立功

臣督勦不力調度乖方請

旨將臣交部議處奏入

上諭內閣曰此次捻匪與粵逆勾結竄陷霍山縣城實因賊眾兵單所致李孟羣因在獨山督勦赴援不及著加恩免其議處知府袁懷忠守備余先元帶勇防勦未能先事豫防均著暫行摘去頂戴代理霍山縣知縣補用縣丞王自輅雖因赴鄉籌糧究難辭咎著

一併摘去頂戴責令帶罪立功以觀後效

初七日

甲申

耆齡奏言查安仁賊匪搭造浮橋將

欲渡河撫州城賊分股出踞新路鋪距李定太營甚近必須先行翦滅再勦安仁九月初九日李定太督隊分路直攻新路鋪斃賊無算而安仁之賊分股渡河竄至河坊村離東鄉僅十餘里李定太派衡勇等營防堵撫郡賊匪抄襲自

率各營往勦進紮大福岡屢敗撲營賊匪先是
臣探聞河坊賊聚日衆安仁之賊分犯貴溪餘
干恐李定太戰久力疲當飭道員帥遠燁帶勇
一千名副將周鳳山帶勇一千七百名均赴東
鄉會同李定太進勦河坊安仁以援貴溪餘干
適安仁賊匪之分犯貴溪者屢被李元度擊退
由鷹潭竄往金谿與撫州賊匪會合其犯餘干

者亦經兵團擊退十月初四日安仁賊匪全股
渡河竄往鄧家埠當將縣城收復而各路賊衆
悉萃東鄉帥遠燁周鳳山所帶各勇行抵東鄉
紮營與李定太軍營相離四五里時河坊賊衆
於虎字營對面築壘十餘處李定太囑令周鳳
山等趕修外濠不必出隊自率各營分路直撲
賊壘正在得手之際不意左路另股逆匪數千

人來撲周鳳山帥遠燁營盤周鳳山率隊迎擊賊匪愈來愈多復有逆匪萬餘人繞由東北擁撲營帥遠燁營盤被焚力竭遇害周鳳山前後受敵勇被衝散李定太聞警徐將隊伍撤回甫抵本營而襲破周鳳山等營壘之賊卽行退去初九日該逆分九股來撲每股約四五百人包圍我營火器雨集營中同時火起勇多潰走

李定太卽馳往截剿被賊擊斷二指各營相繼
被陷李定太突圍而出退紮武陽渡現在逆衆
屯聚撫郡並分抵進賢境內臣已飛飭臨江吉
安水陸各營扼守贛河西岸李定太堅守武陽
渡周鳳山分防三江口以杜逆匪西竄仍督催
臨江各營速拔郡城移師夾擊九江鎮總兵李
定太此次失利實由賊衆我寡且經苦戰五月

情尙可原合無仰懇

逾格鴻慈免其置議副將周鳳山經李定太飭令修築
營牆毋庸出隊乃因另股賊匪撲犯率行出戰
以致營盤襲陷咎無可辭應請卽行革職道員
帥遠燁激於義忿自行募勇千人奮志殺賊力
戰陣亡實堪憫惜遊擊麟春長德通判陳徽言
已革知縣莊丙熊把總柳逢源徐震雲曾聯勝

李雲興何起彪武舉黃金華外委曾興發張言
順額外阮得勝恩騎尉劉朝棟從九品巨丕勳
貢生歐陽繼韓生員言汝玉萬泰步兵闕連陞
在政司理問帥疇臨陣捐軀均堪矜憫應請

飭部併從優議卹奏入

上諭內閣曰此次李定太勦賊失利實因衆寡不敵且
已力戰受傷情尙可原著加恩免其議處副將周鳳

山輕率出戰以致營盤被陷咎無可辭著革職留營
責令力圖堵禦以觀後效陣亡道員帥遠燁等均著
交部從優議卹以慰忠魂

耆齡又奏言臨江各營自擊退大股援賊後更
番攻城該逆猶望外援劉長佑乃於營後二十
里僞爲援賊復至之狀賊果被誘出犯先以數
十人覘我虛實隨分數路猛撲營內各勇鼓譟

而後出敗其南路之賊斬馘無算餘賊急奔入城
西路北路東路之賊來救並經劉長佑蕭啟江
劉于濶等邀擊敗之康國器等率領水陸兵勇
往攻新淦縣城亦將南北兩門土城賊卡踏毀
臨臨郡逆首程瀛等屢次遣人求降適傳安徽援
賊將至該逆又復游移劉長佑等督勇過濠築
壘於西南坡上俯瞰城中賊悉眾出爭被擊敗

退劉長佑親駐新營嚴行守禦劉于瀆亦將平
江營移紮近城期以必克惟皖匪已至撫郡勢
必分援臨吉該逆屢次乞降難保非緩我攻勦
待彼援應臣已嚴飭劉長佑等迅圖克復勿墮
詭計

耆齡又奏言阜田賊匪分股五千餘人竄至峽
江縣擾及烏江仁和經康國器截擊賊始不敢

下竄而劉田等處之賊悉趨峽江將由此路往
援臨郡自烏江至縣城沿河二十餘里紮營四
十五座知縣劉騰鶴率隊往勦賊分三路來拒
鏖戰逾時賊勢稍卻復有賊馬來衝劉連捷從
山坡壓下周福昆從山後繞出賊馬驚逸賊隊
大亂我軍齊進斃賊七八百人餘匪敗匿縣城
及沿河賊壘劉騰鶴薄城圍攻劉連捷督勇先

登殺賊無數餘匪逃向阜田追斬一千餘名溺斃不計其數阜田之賊聞風逃竄一由三曲灘東渡吉水一由桐樹坪退屯吉郡城下劉騰鶴進攻眞君山賊壘焚燬賊營斃賊一千有餘張運蘭等老湘營及普承堯之寶勇已抵沙溪知府趙煥聯率和字營參將劉培元率長字營會合曾國荃吉字營移紮洙口亭進擊沙江股匪

敗其援賊參將遮克敦布帶領贛饒兵勇行至
泰和值賊匪圍撲縣城奮勇援救賊衆解圍逃
竄遂由花石潭直擣白沙殲賊一千數百人追
至永和地方收隊紮營白沙吉郡悍賊糾集土
匪圖撲我營遮克敦布等敗之賊復用船潛來
劫營被我軍擊沈三艘餘卽退回張家渡遮克
敦布等率勇進攻石逆已糾集大股分水陸三

路而來遮克敦布等堵擊獲勝賊不得逞此各營勦賊之情形也臣查前次赴援臨江之賊此時多聚吉安現在我軍老湘營湘後營寶勇自北進吉和長三營自西進遮克敦布等自南進三面分攻以殺其勢臣仍督飭各營節節勦洗先將城外逆眾撲滅偏城圍勦迅圖克復奏入均報

聞

初八日乙酉福濟鄭魁士奏言查逆捻勾合賊匪

竄圍音德布營盤音德布及和州知州陳麟昌等先後接仗潰圍退守移紮官渡廬州距和三百餘里聞信派隊赴援探聞賊衆緊跟竄至官渡搭橋過河直撲全椒經副將塔思哈蕭開甲參將余成蛟憑河扼守人心甫定該逆卽在香

泉紮住而烏江之賊又由東路竄入綽廟集全
椒萬分喫緊該副將先留兵丁會合音德布現
存兵勇駐防官渡隨卽督帶大隊由觀音庵田
家渡進勦賊已由綽廟集擁至河岸我軍分路
迎勦敗其前隊後隊死拒不動余成蛟等三面
夾攻鏖戰數時該逆首尾不能相顧退往綽廟
集各軍跟蹤追逐遂將賊營五座踏毀餘賊向

石橋新甸廟一帶奔逃音德布亦派兵由官渡
趕至會同追殺斬首七百餘級仍回官渡駐守
捻賊雖在夾山關香泉一帶盤踞出沒全椒情
形已鬆而新甸廟竄賊二千餘搭橋過河擾至
司家灣距烏衣不遠塔思哈由官渡帶隊馳抵
烏衣賊聞援師大至遁回江浦塔思哈等留軍
千餘駐紮烏衣協守滁州門戶並令音德布等

將官渡各要口分紮營壘力扼全椒門戶現准
德興阿咨調侍衛伊興額馬隊赴皖協勦如果
該侍衛卽來更助音德布一臂之力臣等查和
州瀕臨大江久被賊踞城垣坍塌去冬克復後
無可憑守音德布暨該州陳麒昌據險紮營屏
蔽東路此次賊捻合股攻撲猝以兵單糧缺潛
師突圍雖稍挫軍威仍能協同援兵力保滁全

腹地功過實足相抵可否將音德布陳麒昌均免其置議出自

逾格鴻慈塔思哈蕭開甲余成蛟帶兵赴援所向克捷

額懇

恩施先予獎勵其餘在事出力員弁兵勇容臣等彙案保奏奏八

上命軍機大臣傳諭勝保袁甲三曰前因和州失守踪

州清流關喫緊論令勝保袁甲三撥兵前赴該處堵
剿本日據福濟等奏和州賊匪經官軍進剿疊次獲
勝現派兵勇駐紮烏衣防守滁州門戶全滁業已化
險爲平勝保等卽毋庸撥兵前往李孟羣因霍山失
守駐紮麻埠兵力甚單勝保等前派總兵樂善進紮
洪家集距六安州祇數十里恐尙不敷援剿著卽酌
量添派前往攻剿六安俟李孟羣克復霍山卽可與

勝保等所派兵勇會合爲次第廓清之計毋誤事機
上諭內閣曰此次賊捻攻撲音德布突圍退守仍能協
同援軍力保全滁功過尙足相抵總兵音德布知州
陳麒昌均著免其置議仍責令進擣和州以觀後效
赴援出力之副將塔思哈蕭開甲均著記名以總兵
用參將余成蛟著以副將遇缺儘先補用其餘出力
員弁等准福濟等彙入廬州擊賊案內擇尤保奏

福濟又奏言查藩司李孟羣身經百戰勇略兼
長因賊衆兵單困守六安西界於大局毫無裨
益以勝保袁甲三得勝全軍尙審慎持重不克
直擣州城李孟羣自亦難冒險獨進與其孤立
而無效曷若變計以求全臣愚擬請

皇上特旨責成勝保袁甲三進圖六安兼顧西北其已
復之英霍並

飭令湖北督撫派隊越境堵扼兼爲勝保等策應至李
孟羣係實缺藩司本當莅任况廬州東南各路
逆衆麕集攻勦需人鄭魁士駐扼廬州力難兼
顧臣居中調度遇有分撥援應殊覺左右支絀
應懇

大恩傳諭李孟羣帶兵速赴廬州相機商取舒城兼顧
三河巢縣和州等處一轉移間於皖北大局實

有關緊奏八

上命軍機大臣傳諭福濟鄭魁士曰李孟羣一軍自鄂
援皖原以疏通廬州西境現在霍山復陷該司正當
力圖克復與勝保等所派兵勇會克六安始能統兵
前進此時斷不能令其卽赴廬州致成株守至湖北
官軍沿江攻剿正當喫緊前經官文等奏明實係不
能分撥已飭進剿宿太之軍爲李孟羣援應現在皖

境賊匪充斥皆由桐城退敗之後該撫坐守廬州置
失陷之區於不問以致賊勢愈張舒城復失含山和
州相繼失事福濟身任封疆竟以用兵之事諉之鄰
省既稱鄭魁士難於兼顧又欲李孟羣併入廬州似
此情形直是以兵自衛所謂居中調度者其謀畫安
在耶李孟羣素有謀勇雖偶然失挫得勝保撥兵相
助必有轉機鄭魁士久歷戎行戰功屢著當此賊氛

猖獗應如何力圖攻勦將舒巢等失守各城次第收復翦除該逆羽翼自固藩籬不當束手無策至此也

同日江蘇布政使文煜奏言臣於本年十月交卸江北糧臺二十二日馳抵常州二十五日准蕭時馥將實存銀兩官票卷宗移交前來臣卽於是日祇領並刊刻總辦江南軍營糧臺江蘇布政使關防一顆開用接辦查江南糧臺自督

臣何桂清督同王有齡籌餉以來不患入款之少而患出款之多督臣復飭蕭時馥將各分局全行裁撤歸併兩局凡稍可節省之費業已十減其七差遣委員亦裁汰過半臣當恪遵督臣章程就近稟商辦理奏入報

聞

初九日

丙戌

和春奏言金陵援賊由石埠橋龍潭

至沿江沙洲一帶步步前進連營二十餘里欲
攻我高資營盤以圖聯絡鎮城接濟糧食十月
十七日句容紅子橋地方有賊匪二千餘人竄
至牌頭橋上海村一帶兵勇分段迎勦賊始敗
竄計斃逆匪三四百名二十二日城中逆匪千
餘潛赴江邊襲我高資東路營盤我軍迎擊獲
勝斃賊無算二十六日金陵援賊約四五千繞

至南岸撲我高資西路營盤我軍分三路抄擊賊衆大潰而柴圩賊巢內又出兩三千人分路來援張國樑親督副將戴文英等分途接戰逆衆少卻兵勇直前衝殺逆屍枕藉約斃賊五六千名餘匪飛遁入巢張國樑許乃劍會商鎮逆接濟久斷所恃全在外援今又勾結捻匪糾集醜類屬聚江濱意在奪我高資必須將此股援

賊悉數掃蕩方能絕其希冀之心當傳令各營
戒嚴持重以待其來二十九日援賊二三千人
渡過運河南面連築三壘直逼我營之左各兵
勇分途疾馳直撲逆匪新營逆匪出巢拒戰沙
洲賊營亦開礮相拒張國樑揮軍直進逆勢不
支敗走入巢馮子材張玉良等分攻賊營破其
三壘餘賊搶過浮橋欲往沙洲竄逃適臣督軍

趕到遂會合張國樑跟蹤追擊斃賊不計其數
賊大敗不敢歸巢落荒而逃張國樑乘勢圍攻
賊營營內賊匪奪路欲遁兵勇衝進殺賊甚多
卽將賊營六座一併奪獲餘賊四散奔逃適虎
坤元由句容趕至合力截殺自高資至下蜀街
之東綿亙二十餘里所有援賊營壘卡房四十
餘座一律踏平共計殲斃淹斃賊匪不下五千

餘名伏查逆首吳如喙困守孤城希冀外援苟
延喘息此次大受懲創足以褫逆魄而快人心
現已申徹各營益加謹慎儻該逆鋌而走險立
卽分投跟勦以期掃淨根株奏入

上諭內閣曰金陵逆匪因鎮江之賊被圍窮蹙率黨來
援並勾結江北捻匪冀圖竄併此次大受懲創援賊
淨盡鎮江賊匪已屬坐困無援著和春等迅督諸軍

剋期收復毋任竄逸

和春又奏言臣接奉

諭旨令保江南軍營武職大員幫辦德興阿軍務旋接
德興阿來咨以江南軍營人材惟張國樑謀勇
兼優此外恐難勝幫辦之任特保江北武職大
員總兵鞠殿華堪當此任等語查張國樑現在
親統大軍扼紮高資攻勦萬分喫緊本難移動

此外提鎮各員亦於江北情形生疏德興阿所保翰殿華一員臣亦聞其勇敢有爲係江北武職大員出色人材以之幫辦軍務定能得力奏
八

上諭內閣曰山西大同鎮總兵翰殿華現在德興阿軍營卽著幫辦軍務

十二日己丑晏端書奏言浮梁賊匪竄入祁門縣

境當飭祁門之華橋柏溪兩處防兵嚴密備禦
該逆由一心嶺竄至離城五里盧公橋經遊擊
馬懷珍等帶兵迎擊頗有斬馘該逆隨竄越縣
城進偪華橋營盤時守備周光順等趕到該逆
退踞五里牌堅築營卡周天受江長貴先後馳
至派隊分路進攻酣戰多時周天受督同唐寶
昌等由小徑疾趨抄入王夢齡等沿河截殺江

長貴亦由山梁督隊追勦四面包抄該逆紛紛
敗退連戰皆捷焚燬五里牌賊巢追殺三十餘
里沿途斬獲甚衆解散脅從數千餘匪盡向池
州府竄逸查此次浮梁股匪竄入祁境意欲由
徽至甯聯絡蕪湖卡匪茲於竄擾之初遏其兇
燄不至勾結蔓延勦辦可期得手藍翎五品軍
功儘先把總柳向春手刃數賊力竭捐軀仰乞

恩施飭部從優議卹以慰忠魂奏入

上諭內閣曰此次賊匪竄擾祁門意圖勾結蕪湖股匪
經周天受等會同擊退力扼要衝勦辦尙爲得手著
卽將竄匪悉數殲除毋留餘孽藍翎五品軍功儘先
把總柳向春殺賊捐軀殊堪憫惻著交部從優議卹
十九日丙申德興阿翁同書奏言臣等連日飭令
馬步各營晝夜換隊明攻暗擾使賊不得休息

臣德興阿親督官兵至八里鋪一帶修築營盤
揚言新調北路勁旅萬餘名移營進逼該逆聞
之益形恐懼適南岸外援又經和春等擊敗該
逆食盡援絕萬分窮蹙連日於深夜潛出向土
橋一帶衝撲經水陸官軍擊回每次均有斬擒
十一月十二日臣等密派總兵成明等薄暮潛
師而進鞠殿華前戰受傷是日仍裹創乘馬會

同成明等進攻行至四里鋪聞賊營內人聲鼎沸知其膽虛驚擾遂督隊魚貫而進直撲賊營該逆登陴拒戰我軍賈勇踰溝將火器拋入賊營引燃火藥煙燄衝霄適見隔江山上亦有火起知係南軍得手我軍人人奮勇將上中瓜州土城圍住踰城而入賊匪見勢不敵各鳥獸散焚殺淹斃者不計其數當將瓜州克復指揮丞

相檢點元勳師帥司馬等僞官悉就誅戮東路
下瓜州賊營尙有餘匪二百餘人膽敢持械抗
拒經官兵迎擊殲斃大半餘匪投水自溺隨將
賊營五座踏毀一面揀派得力大員迅帶馬步
兵勇卽日移師西上進攻江浦查粵匪踞守瓜
州迄今五載仰仗

皇上天威一鼓而克洵足以大快人心其南岸沿江一

帶同時火起想鎮城亦已克復從此大江南北
可以計日廓清所有江北水陸官兵容臣等將
在事出力文武員弁擇尤酌保用示鼓勵奏入

上諭內閣曰瓜州逆匪踞險負隅已歷數載自德興阿
等統兵圍攻疊次奏報水陸均能得手正盼捷音速
奏迅掃賊巢茲據該大臣等奏稱已於十一月十二
日克復瓜州覽奏實爲欣慰德興阿督師兩載調度

有方加恩著賞戴雙眼花翎並賞給騎都尉世職翁
同書贊畫機宜躬親督隊加恩著賞穿黃馬褂以侍
郎候補翰殿華業經派令幫辦軍務此次裏創立戰
奮勇可嘉著賞加提督銜遇有提督缺出由軍機處
提奏其餘出力文武員弁著德興阿等擇尤保奏候
朕施恩

二十一日

戊戌

德興阿翁同書奏言臣等於本月

十二日攻克瓜州業將大概情形馳奏茲據土
橋水師總兵陳國泰稟稱十二日黃昏時遙聞
北岸槍礮之聲知陸營出隊卽分駕紅單等船
乘風直抵瓜州駛進大口擊沈匪船多隻淹斃
賊匪不計其數忽見賊壘內起有火光知陸兵
業已得手揮令師船攏偪江岸火器齊施該匪
四出逃走殺賊甚多奪獲大小船三十餘隻瓜

州隨卽克復又據焦山水師總兵泊承陞陳世忠稟稱十二日督帶艇師進攻鎮江瞥見瓜州小口突出大小賊船數十隻揚帆而南各艇加槳迎截擊沈賊船三十餘隻賊船轉帆欲遁艇師分兩翼抄截圍燒焚斃及赴水死者約計千人乘勝分幫進逼金山登岸搜捕餘賊披靡落水死者不計其數復督各艇施槳直前逼近瓜

州之新河口龍王廟等處將賊船攻毀現在分
幫駐紮金山等情又據陸路副將英貴等稟稱
於江邊蘆葦叢中搜獲餘匪五百餘名生擒僞
總制蕭禮方胡有罄僞元勳陸有汰等概行正
法瓜州一帶東西數十里內一律肅清現已派
成明富明阿帶領馬步諸軍前赴浦口並合陳
國泰督帶水軍西上迅掃逆氛奏入

上諭內閣曰德興阿等督兵克復瓜州時水師總兵陳國泰等分駕紅單等船駛進瓜州大口斬斷鐵練擊沈該匪大小船多隻泊承陞陳世忠等亦於是日將瓜州小口賊船擊沈三十餘隻瓜州一帶東西數十里一律肅清並無竄匪漏網勦辦實屬奮勇所有土橋焦山水師出力各員弁著德興阿等查明彙保請獎

同日和春奏言南岸官兵於十月二十九日大捷後三十日復奪獲下蜀街西賊營十七座斃賊無數並殺死首逆洪秀泉之姪僞安王洪芒發及僞丞相等多名賊供洪逆因鎮城糧斷勾結捻匪並調和巢一帶賊黨來援實有數萬之衆兩次被官兵殺死大半嗣後尙有大股前來等語本月初八日探得龍潭又到援賊萬餘在

該處築壘勢甚狃猖 臣與張國樑許乃釗會商
此次援賊來勢甚速惟有乘其初到馳往痛勦
方可以絕鎮逆之望當卽派兵分道進剿初九
日行抵龍潭賊以大股迎戰相持甚久張國樑
別遣一軍攻其最後之營虎坤元等乘虛衝入
賊壘立將賊營據住縱火焚燒該逆不敢歸巢
四散奔走其餘各營之賊仍復固守官兵拋擲

火器賊營火起賊衆越牆逃竄卽將賊營七座
賊卡二處一律奪毀追殺數十里屍橫遍野斃
賊六七千名鎮城逆匪因糧絕援斷有傾巢出
撲高資以圖外竄之信臣密飭各營一體嚴防
隨派隊攻打城外賊營並分路進攻各門賊匪
正紛紛出巢不圖官兵掩至且拒且走我軍直
徧外濠卽將摩旗山賊營奪獲並將寶蓋雲臺

諸山賊營焚燬李若珠等分攻各門正遇賊匪
從西門出一路迎殺直逼城下李若珠督兵衝
入官兵相繼登城四面殺進斃賊不可勝計卽
於十二日將鎮江府城克復其城內及城外賊
壘突出之賊分三路直撲高資張國樑先飭各
營嚴陣以待該逆不敢衝突適 臣督領李若珠
等馳至會合張國樑前後夾擊逆屍枕藉餘匪

紛竄官兵由高資追至倉頭沿途搜殺殆盡約
計殺賊近萬惟首逆吳如哮是否同時就戮未
敢懸擬當克復鎮城時遙見瓜州火發探聞亦
經官兵攻復瓜鎮兩巢一律肅清實深慶幸張
國樑謀勇超羣秉性忠正與臣同心協力共濟
時艱許乃釗遇事籌商機宜悉協督臣何桂清
督同署藩司王有齡設法籌濟軍餉顧全大局

東南軍務從此大有轉機所有最爲出力之鎮將臣謹先行開列懇予獎勵其餘出力文武員弁容查明另行請獎

同日何桂清趙德轍奏言金陵逆匪因鎮江被圍嚴密先後糾集各路匪徒由和州一帶渡江來撲高資營盤經和春張國樑親督將士兵勇抄其後四次勦洗踏毀賊壘五六十座斬馘六

七千級陣誅及溺死者以數萬計卽於十二日
夜克復鎮江府城所有金山及鎮江城外賊營
俱已掃蕩並無一賊北竄臣等卽飛飭常鎮道
喬松年酌帶委員馳往督辦善後臣何桂清俟
部署稍定亦卽親往犒勞三軍並與和春等面
商防勦機宜再行具奏均奏入

上命軍機大臣傳諭德興阿翁同書鞠殿華和春張國

樑許乃釗何桂清曰瓜鎮兩處賊巢同日克復金山
一帶賊匪亦一律肅清金陵賊勢已孤即可直抵賊
巢殲擒首逆但江浦縣城尙爲賊踞德興阿現派成
明等軍前赴浦口並令陳國泰管帶師船西上蕞爾
孤城諒亦不難攻克惟六安匪衆來援者號稱數萬
雖經張國樑等擊退殲斃甚多其竄往金陵者恐尙
不少况上游安慶巢窟未除此時攻剿金陵必須統

籌全局所有江北一帶著責成德興阿翁同書翰殿
華迅速進勦和春張國樑留兵駐守鎮江卽可進攻
金陵鄧紹良扼守甯國與蕪湖相近並著飭令相機
援應至金山爲江面要隘業經水師駐紮南北皆可
策應著卽實力巡邏使上游匪黨不能下竄中流得
此鎖鑰則勦辦金陵較易得手該大臣等當隨時會
商辦理迅奏膚公何桂清已派員馳往鎮江辦理善

後事宜並擬親赴大營犒賞軍士更足鼓舞兵心其瓜州一帶地方應辦善後事件亦著該督妥籌布置上諭內閣曰金陵逆匪分黨占踞鎮江與瓜州逆黨互爲犄角昨據德興阿等奏克復瓜州朕料賊窮蹙鎮江必能得手茲據和春等奏稱金陵四次來援之賊均已擊殺殆盡亦於本月十二日將鎮江府城克復和春督師以來調度有方此次復能力拔堅城實堪

嘉尙加恩著賞戴雙眼花翎並賞給二等輕車都尉
世職幫辦軍務湖南提督張國樑秉性忠正謀勇超
羣與和春同心協力共奏膚公加恩著賞給騎都尉
世職三品頂戴前任江蘇巡撫許乃釗協贊戎機著
有勞績加恩著賞戴花翎兩江總督何桂清籌濟軍
餉不遺餘力能令士飽馬騰奮勇用命加恩著賞給
太子少保銜署江蘇布政使按察使王有齡隨同籌

畫餉精實與效力行間無異加恩著賞給二品頂戴
其先行保奏尤爲出力之陝西陝安鎮總兵王浚廣
西右江鎮總兵李若珠均著賞加提督銜雲南鶴麗
鎮總兵余萬清著賞戴花翎甘肅巴里坤鎮總兵明
安秦湖北宜昌鎮總兵虎嵩林直隸通永鎮總兵虎
坤元均著交部從優議敘總兵銜儘先副將廣東雷
州營參將張玉良總兵銜儘先副將湖南撫標參將

周天培總兵銜兩江督標中軍副將戴文英儘先副將廣東提標遊擊馮子材均著交軍機處記名遇有總兵缺出請旨簡放已革浙江黃巖鎮總兵陳世忠著開復總兵仍留原任江南狼山鎮總兵泊承陞著開復頂戴以示獎勵其餘在事出力文武員弁兵勇著和春等查明保奏候朕施恩

同日福興奏言饒州所屬之景德鎮地方逆匪

踞爲巢穴數年之久江皖大股匪徒往來出沒
悉由於此臣檄令署知府馮洵號召浮梁樂平
等縣民團協助進攻馮洵會商在籍之已革皖
南道石景芬招集鄉團數千抽撥饒防官軍從
黃岡鮎魚山一路會合前進十月初一日敗賊
於湘湖街初二初三日敗賊於高規渡沖雞嶺
白鷺港等處另股竄撲鮎魚山一路亦經把總

朱洪章擊敗回巢逆勢已衰初四日兵團進擣
景鎮敗其撲營之賊匪衆退赴羅家灘初六日
官軍鄉勇分道追殺羣賊悉往洗馬橋一路遁
走遂將景鎮收復察看逆蹤皆竄往祁門建德
一帶臣抽撥協和營勇交馮洵派往協防稍資
厚集奏入報

二十三日

庚子

上命軍機大臣傳諭官文都興阿胡林翼楊載福曰昨據德興阿和春先後奏報本月十二日克復瓜州鎮江已諭令該大臣等乘勝進攻金陵揜渠埽穴惟該逆鋌而走險若從金陵竄出必奔安慶而上游九江尚未克復楊載福一軍勢難遽行東下該提督前已駛過安慶攻毀賊營數處其用兵謀略實有過人之

處現在金陵可望克復若得該提督水師與紅單等
船會勦該逆必無逃竄之路著官文等卽傳旨令楊
載福速攻九江毋再延緩一經得手卽乘勝將沿江
賊壘掃除直抵安慶都興阿督帶陸兵進勦宿太如
楊載福已克九江移師東下水陸相輔更能得力楊
載福已離楚境以後軍務情形卽著該提督自行奏
報如與都興阿軍營相近卽著會銜具奏

二十八日乙巳德興阿翁同書奏言臣等克復瓜

鎮後金陵逆匪出船多隻在觀音門口內屯聚似欲接渡敗殘之賊經參將黃彬等督船直進觀音門內河賊望下關逃遁黃彬等揮令各船追勦賊眾棄船登岸各勇亦登岸追捕斃賊無算餘俱潰散遊擊彭常宣瞭見五龍山巴斗山燕子磯一帶火光延互親帶快船直進口門遙

見賊船在巴斗山下過渡飛駛向前截擊該逆
見我軍突至四散奔逃遁至燕子磯山根棄船
登岸奔向賊壘我軍跟蹤追殺槍近賊壘彭常
宣手刃賊目一名逆衆見賊首伏誅紛紛潰出
我兵乘勢掩殺投塘落澗死者不計其數當將
燕子磯賊壘攻克參將李新明亦於帶子洲江
面奪獲賊划多隻並擒斬郭家斗門南岸之賊

乘勝進攻石埠橋直擣賊壘賊匪見勢不支全
行潰散立將賊壘焚燬查燕子磯石埠橋皆係
南岸濱江險要賊匪連營負固未易鏟除今經
水軍協勦掃蕩無遺該水師上下夾擊其功甚
偉相應籲懇

天恩准於克復瓜州案內一體從優獎敘奏入

上諭內閣曰燕子磯與石埠橋均係金陵險要經該水

師將弁將賊營悉數鏟除辦理極爲得手此次在事
出力員弁著德興阿等彙入克復瓜州案內擇尤保

奏